



Sesida dals

24 d'avust 2020

Communitgà ils

31 d'avust 2020

Protocol nr.

695

Dumonda Grass

concernent novaziuns per metter grascha sin champs

Resposta da la Regenza

Tenor l'art. 6 da la Lescha federala davart la protecziun da las auas (LPAuas; CS 814.20) èsi scumandà d'inducir en in'aua u da laschar sfundrar substanzas che pon contaminar l'aua. Plinavant èsi er scumandà da deponer u da sterner talas substanzas ordaifer in'aua, sche quai chaschuna in privel concret che l'aua pudess vegnir contaminada. Fin ussa eran las incumbensas fixadas en duas directives da l'Uffizi d'agricultura e da geoinformaziun (UAG) e da l'Uffizi per la natira e l'ambient. L'onn 2012 han l'Uffizi federal d'ambient (UFAM) e l'Uffizi federal d'agricultura (UFAG) relaschà ils agids d'execuziun "Construcziuns ruralas e protecziun da l'ambient" e "Substanzas nutritivas ed utilisaziun da ladim en l'agricultura". Da vart dal chantun è vegnida relaschada per il 1. da schaner 2020 in'Ordinaziun davart la protecziun da las auas en l'agricultura (OCPAAgr; DG 910.150) ed elavurà in agid d'execuziun "Protecziun da las auas en l'agricultura dal Grischun". Quests documents cuntegnan ils puncts or dals dus agids d'execuziun da la Confederaziun ch'èn essenzials per il Grischun e ch'èn vegnids adattads uschenavant sco pussaivel a las relaziuns chantunalas spezialas, e concretiseschan lur applicaziun en moda illustrativa. Els reproduceschan da princip la pratica vertenta. Tenor la Confederaziun n'è il deposit temporar da grascha sin il champ da princip betg permess. Per motivs da l'andament dal manaschi po la grascha vegnir depositada intermediarmain sin las surfatschas che duain vegnir ladadas per maximalmain 6 emnas, fin ch'ella vegn fatga ora, premess che ses deposit na chaschunia betg in privel concret per ina contaminaziun da l'aua. Ils deposits da grascha na fan betg part da la bilantscha da deposit dal manaschi e na dastgavan er fin ussa betg vegnir mess a quint al volumen da deposit necessari. En la OCPAAgr è il deposit temporar da curta durada vegnì augmentà – cun il consentiment dal UFAM – a maximalmain 8 emnas per tegnair quint meglier da las cundiziuns climaticas spezialas dal territori da muntogna.

La protecziun da las auas en l'agricultura è dapli plirs onns in tema ed è vegnida communitgada repetidamain tant dal Servetsch da cussegliaziun agricola sco er dal post executiv. Dapi l'onn 2015 vegnan fatgas sistematicamain controllas da l'ermeticitad sin ils manaschis e calculada la bilantscha da deposit. Davart quest project che cumpiglia tut il chantun èsi vegnì rapportà pliras giadas. Fin ussa èn gia vegnids controllads 1700 manaschis, pia circa trais quarts da tut ils manaschis da l'entir onn e da tut ils manaschis d'alpegiada che ston vegnir controllads durant l'emprima fasa. Sch'il volumen da deposit mancava, èn vegnidas ordinadas mesiras architectonicas u manaschialas, e quai independentamain da l'entrada en vigur da la

OCPAAgr. La Regenza è conscianta dal fatg che manaschis che n'adempleschan betg las pretensiuns fatgas pon arrivar a las stretgas e dovran correspundentamain temp per realisar las mesiras architectonicas. Il Servetsch da cussegliaziun agricula sco er il UAG stattan a disposiziun als manaschis cun vusch consultativa. I vegn però premess che las prescripziuns fundamentalas per cultivar en moda ordinaria ils deposits temporars sajan enconuschantas e ch'ellas vegnian realisas en atgna responsabladad dals manaschis. Cun la communicaziun ch'ils criteris per cultivar en moda ordinada ils deposits temporars valian explicitamain a partir dal 1. d'avust 2020, èn ils manaschis anc ina giada vegnids rendids attents a las prescripziuns, per ch'els possian realisar ina midada individuala entaifer in termin adequat. Las experientschas ch'èn vegnidas fatgas dapi l'entrada en vigur han mussà ch'i han pudì vegnir chattadas svelt soluziuns. Numerus resuns da puras e purs mussan ultra da quai che las regulaziuns chattan in consentiment gist er tar la protecziun da las auas.

Tar la dumonda 1: La OCPAAgr sa basa tranter auter sin ils agids d'execuziun da la Confederaziun ch'i dat dapi l'onn 2012. Cun la OCPAAgr vegnan mo concretisads ils principis enconuschents e las directivas surordinadas per proteger las auas. Ultra da quai datti differentas pussaivladads per ademplir las prescripziuns (guardar dumonda 2). Pervia da quai n'èsi betg adequat da spustar l'entrada en vigur.

Tar la dumonda 2: La legislaziun federala na prevesa naginas permissiuns excepziunalas. Pervia da quai na po er il chantun betg conceder talas. I ston vegnir chattadas soluziuns alternativas per depositar grascha sur 8 emnas, fin che avunda volumen da deposit po vegnir mess a disposiziun sin il manaschi. Per quai stattan a disposiziun differentas pussaivladads sco contracts da surpigliada e da deposit temporar u er ina cumpostaziun a l'ur dal champ che permetta da depositar grascha fin ad 1 onn. I dat anc adina er la pussaivladad da far deposits temporars per ulteriuras 8 emnas durant il temp da vegetaziun.

Tar la dumonda 3: La OCPAAgr concretisescha disposiziuns ch'èn fixadas en la legislaziun federala. Sch'ellas na vegnan betg observadas, po quai vegnir sancziunà – tut tenor la grevezza dal surpassament – cun stritgar pajaments directs fin ad ina denunzia. Uschia è per exempel l'observaziun da la durada maximala da deposits temporars mo ina da numerusas prescripziuns che vegnan controlladas. Sch'i vegn constatà che la grascha vegn depositada en moda incorrecta sin il champ, vegnan ils pajaments directs sancziunads sco fin ussa en dependenza da la violaziun da l'obligaziun d'avair quità. En cas grevs smanatscha ina denunzia penala.



En num da la Regenza

Il president:

Dr. Chr. Rathgeb

Il chancelier:

Daniel Spadin